

**COLUMNNA**

# Notgs senza sien

CHATRINA JOSTY KREUZER

**C**un 37 onns e senz'uffants sun jau plaunsieu la suletta en il club da quels che dorman tras. E sche quels auters – amis, parents ed enconuschents – che han notgs senza sien u ina sien che vegn adina puspè interrutta pervi dals pops e las poppas da differentas vegliadetgnas, sche quels ma raquintan tut caputs da lur notgs e sch'els èn adina in pau absents durant il di, lura hai jau schon cumpassiuun. Ma propi chapì e propi badà vi da l'agen corp e l'atgna olma n'hai jau anc mai, tge che quai vul dir.

**E**nfin tar il champ da scola, la «Landschulwoche», la fin d'avust.

**B**etg ma dumandar tgi ch'è vegnì sin l'idea che ils scolars bernais dovrian per forza ina «Landschulwoche». Ma il champ, en noss cas a Kandersteg, è standard en il chantun Berna e quai betg forsà mo sin il stgalim superiuur, cura ch'els èn già gronds ed autonom. Na, nossa scola a Moosseedorf prevesa in champ da scola mintga dus onns e quai a partir da la segunda classa! Ed uschia da mai era en la quarta classa. Gea, ed uss sai jau tge che geniturs dad uffants pitschens (u magari era gronds) manegian cun lur notgs malquietas. In protocol da mias notgs:



**G**lindesdi: Nus arrivain a Kandersteg ed en in zac-zac hai jau tratg si tut ils nov letgs dals buobs (fatg a chasa n'hai jau anc mai in dad els). Las mattatschas survegnan agid da duas studentas che m'accumpognan.

**S**uenter tschaina scutin jau mo pli cun ellas e cun ils uffants, per ch'els sa quieteschian e dormian speranza bainbaud. Jau prelegel in'istorgia e lura: dai a cuz! A las 20.15 èn tut ils 21 uffants en letg. Ma enfin ch'els dorman, stun jau si var 1000 giadas, perquai che in sa lascha encrescher, l'auter ha tema dal stgir ed il terz ha dents che balluccan.

**J**au less en sasez era durmir, ma quai n'interessescha nagin.

**M**ardi: Viva ils rituals e viva il vin cotschen! Grazia als rituals (simpla-

main far mintgadi exact il medem, era sch'igl è lungurus) e grazia ad in magielin vin cotschen per mai, èn ils uffants puspè a cuz ad ura. Punct a las 21.15 na vi jau udir nagin pip pli per ch'els ins na dasdian betg als auters e cumenzan forsà era a cridar perquai ch'els sa laschan encrescher. (Tgi ha en sasez gì l'idea da far tals champs? Durant il di èsi gea tut ok, ma las notgs, diomaria!) Jau ur che questa notg daventia meglra e che jau dormia daplì che mo trais uras. E Dieu m'ha para udì, forsà grazia al spiert da la chasa, che vegn gugent era frequentada da gruppas religiosas. Jau ma durment curt suenter las diesch e dorm ina sien profunda. Enfin exact a las 02.15 cura ch'in buob ma dasda per dir curtamain, ch'el na sappia betg sa durmentar. Avant che jau vegn da reagir e forsà offrir in magiel latg (u tge fan ins en tallas situaziuns?) è el già puspè davent e cun quai era mia sien... per il rest da la notg.

«**Q**uai passa. I daventa segir adina meglier.» Jau ma prov da consolar cun ils tips che jau hai dà enfin uss a geniturs giuvens... senza savair da tge che jau discor. Stgisai, jau sun e patesch cun vus.

**Chatrina Josty Kreuzer** lavura sco scolasta a Moosseedorf en il chantun Berna.